



青州府志  
(嘉靖)

四

青州府志卷之十五

忠義

老子曰身與名孰親信斯言也死生難矣嗟乎此  
曳尾畏犧說也執圭委贄漫茲藉口悖哉士當航  
晏濶視矜談臨難不回蓋亦鮮矣彼其喪元湛族  
死暱死僞君子憐之況得其所者邪作忠義傳

**周齊太史南史氏**史逸其名崔杼弑莊公太史書  
曰崔杼弑其君崔子殺之其弟嗣書而死者二人  
其弟又書乃舍之南史氏聞大史盡死執簡以往

聞既書矣乃還

**陳不占**齊臣聞崔杼弑莊公將赴之比去餐則失  
匕上車失軾御者曰怯如是有益乎不占曰死君  
義也無勇私也不以私害公遂往聞戰鬪聲恐駭  
而死

**申蒯**莊公侍漁崔杼弑莊公蒯退謂其宰曰爾以  
孥免我將死其宰曰免是反子之義也與之皆死  
**邢蒯**齊臣崔杼弑莊公蒯賸使而返驅之將入  
死而報其君其僕曰君之無道也四鄰諸侯莫不

聞也以夫子而之死之不亦難乎蒯曰吾聞食其祿者死其事吾食亂君之祿矣又安得治君而死之遂驅入死其僕曰人有亂君人猶死之我有治長可無死乎乃結轡自刎于車

**石佗人**

齊臣陳恒弑簡公而盟者皆完其家不盟

者殺之佗人曰昔之事君者皆得其君而事之今謂佗人曰舍而君事我佗人不能雖然不盟則殺父母也從而盟是無君臣之禮也生于亂世死不得正行劫于暴上不得義故雖盟不以父母之死

不如退而自殺以禮其君遂自殺

**杞梁**名殖齊人仕爲大夫莊公伐莒爲車五乘之  
賓梁不與歸而不食其母曰汝生而有義死而有  
名則五乘之賓盡汝下也趨食乃行至莒一人出  
鬪獲甲首三百莊公曰子止與子同齊國梁曰君  
不使梁與五乘是少吾勇也臨敵止我以利是污  
吾行也深入多殺臣之事也齊國之利非吾所知  
也遂鬪而死其妻聞而哭之城爲之崩

**華還**齊大夫**華周**也齊侯伐莒杞殖華還先遇莒

子於蒲侯氏莒子重賂之使無死具請有盟周對  
曰貪貨棄命君所惡也昏而受命日未中而棄之  
何以事君遂與殖戰而死

**王蠋**齊畫邑人屢諫湣王不聽退而耕于野燕樂  
毅破齊聞蠋賢將封以萬家蠋固謝曰忠臣不事  
二君烈女不更二夫遂縊死齊士大夫聞之曰王  
蠋布衣也義不北面於燕況在位食祿者乎乃求  
湣王子法章立之是爲襄王

**田橫**故齊王榮弟項羽破齊復擊漢橫乃以散兵

復收齊城邑立榮子廣爲王而相之及廣死橫自立爲王漢高帝旣立橫與其徒五百餘人入居海島高帝召之乃乘傳詣洛陽未至自剄其徒五百人聞橫死亦皆自殺

**漢伏隆**少以節操立名建武二年張步兄弟各擁彊兵據有齊地拜隆爲太中大夫持節使青徐州招降郡國隆移檄諸群盜皆惶怖卽時降張步遣使隨隆詣闕上書獻鮫魚其冬拜隆光祿大夫復使於步并於新除青州牧守及都尉俱東詔隆輒

拜令長以下隆招懷綏緝多來降附帝嘉其功比之酈生卽拜步爲東萊太守而劉永意復遣使立步爲齊王步貪受王爵猶豫未決隆曉譬不聽求得反命步遂執隆而受永封隆遣間使上書言臣奉使無狀受執凶逆雖在困厄授命不顧又吏人知步反畔心不附之願以時進兵無以臣隆爲念臣隆得生到闕廷受誅有司此其大願若令沒身寇手以父母兄弟長累陛下與皇后太子永享萬國與天無極帝得隆奏召父湛涕以示之曰隆可

謂有蘇武之節恨不且許而遽求還也其後步遂殺之時人憐焉

**齊崔肇師**清河東武城人魏尚書僕射亮之孫也肇師少頗踈放長遂變節更成謹愿涉獵經史頗有文思襲父爵樂陵男釋褐開府東閣祭酒轉司空外兵叅軍遷大司馬府記室叅軍天平初轉通直侍郎爲慰勞青州刺史至齊州界爲土賊崔迦葉等所虜欲逼與同事肇師執節不動喻以禍福賊遂捨之乃巡慰青部而還

**隋杜松贊**北海人性剛烈重名義爲石門府隊正  
大業末有賊楊厚擁徒作亂來攻北海縣贊從郡  
兵討之贊輕騎覘賊爲厚所獲厚令贊謂城中云  
郡兵已破宜早歸降贊僞許之旣至城下大呼官  
軍大來罵言未卒賊已斬斷其腰煬帝優詔褒揚  
贈朝散大夫本郡通守

**唐劉康義**益都人昭宗時爲密州刺史楊行密陷  
其城康義死之

**王師範**青州人以忠義自許爲淄青平盧節度使

時朱溫圍鳳翔師範見詔書泣曰吾屬爲帝室藩  
屏豈得坐視天子困辱雖力不足當死生以之遂  
起兵討溫求助於楊行密斬朱友寧於青州兵及  
淮南力不能支爲溫所族

**張道古**臨淄人景福中進士釋褐爲著作郎遷右  
拾遺昭宗時貢五危二亂表云只今劉備孫權已  
生於世矣謫施州司戶叅軍後聞駕走西岐又遷  
東洛皆契五危之事悉歸二亂之源後入蜀王氏  
聞而憾之乃變姓名賣卜導江青城市中建開國

召爲武部郎中至玉壘關謂所親曰吾唐室諫臣  
終不能拳跼與鷄犬同食雖召必再貶於死之日  
葬我於關東不毛之地題曰唐佐輔補闕張道古  
墓後遇害妻亦繼亡蜀主憫之俾祔葬鄭雲叟有  
詩哭之

**五代**孫晟密州人少好學有文詞初仕唐莊宗爲  
著作佐郎後爲安重誨所惡乃奔南唐官至司空  
周世宗征淮李景懼遣王崇質副晟奏表世宗留  
之晟語崇質曰吾行必不免然終不忍負永陵一

杯土世宗待晟甚厚召問江南事終不對世宗怒  
下獄會南唐蠟書斥周過惡乃殺晟臨刑神色怡  
然南望拜曰臣惟以死報國唐主哀之贈魯國公  
**夏魯奇**字邦傑青州人唐莊宗賜姓名曰李紹奇  
莊宗嘗以百騎覘敵遇伏兵圍之魯奇力戰手殺  
百餘人身被二十餘鎗與莊宗決圍而出又從戰  
中都擒王彥章莊宗壯之拜鄭州防禦使遷河陽  
節度使徙鎮忠武後董章攻遂州魯奇閉拒之旬  
月救兵不至城中食盡自刎死

**宋王輝**青州人靖康間應募立功官至巡檢使寓吉州茶寇犯邑郡以輝驍勇檄之使行至勝鄉地險輝勇於進爲賊所得以刃加頸欲降之輝含血大罵遂死事聞贈忠州刺史

**陸有常**欽宗時知臨淄會臨朐土兵作亂有常率民兵拒守戰死知益都縣**張保**千乘縣丞**丁興宗**皆死之

**李邈**清江人欽宗時以觀察使知青州會金兵將至邈聚財募兵共爲死守計久之城陷被執幹離

不脅使拜不屈曰汝不於此時還二帝及兩河地  
歲取重幣如契丹彊尚可恃也金人諱其言命邈  
被髮左衽邈憤怒詆毀甚力金人怒殺之將死顏  
色不變南望再拜端坐受戮高宗贈招化軍節度  
使

**王允功**建炎二年爲北海縣丞金人來攻城允功  
與濰州守韓浩率衆死守城陷力戰死之及司理  
叅軍王薦皆全家陷沒

**周中**世居濰州建炎二年金人攻城率家人乘城

拒守中弟幸家最富盡散其財以享戰士城陷中  
闔門百口皆死紹興六年褒贈

**密祐**密州人徙廬州累官江西路副總管咸淳中  
爲江西都統元伯顏兵東下至隆興祐率衆逆戰  
大兵圍數重祐告其部曰今日死日也若力戰或  
有生理兵敗被執竟不屈而死

**金時茂**先日照縣沙溝酒監寓居諸城紅襖賊方  
郭三據密州過其村居民相率迎之賊以元帥自  
稱茂先怒謂衆曰此賊首耳何元帥之有方郭三